

### 阿毗達磨法蘊足論卷第八

尊者大目乾連造

三藏法師玄奘奉 詔譯

#### 無色品第十三

一時薄伽梵在室羅筏住逝多林給孤獨園。爾時世尊告苾芻衆：有四無色，何等爲四？謂有苾芻超諸色想，滅有對想，不思惟種種想，入無邊空，空無邊處具足住，是名第一。復有苾芻超一切種空無邊處，入無邊識，識無邊處具足住，是名第二。復有苾芻超一切種識無邊處，入無所有，無所有處具足住，是名第三。復有苾芻超一切種無所有處，入非想非非想處具足住，是名第四。

超諸色想者：云何諸色想？謂眼識相應想等想，現前等想，解了取像，已想當想，總名色想。有作是說，與五識相應想等想，乃至已想當想，總名色想。今此義中，唯眼識相應想等想，乃至已想當想，總名色想。如是色想，爾時超越等超越，故名超諸色想。滅

有對想者：云何有對想？謂耳等四識相應想等想，乃至已想當想，總名有對想。有作是說，瞋恚相應想等想，乃至已想當想，總名有對想。今此義中，耳根四識相應想等想，乃至已想當想，總名有對想。如是有對想，爾時斷遍知，遠離極遠離，調伏極調伏，隱沒除滅，故名滅有對想。不思惟種種想者：云何種種想？謂有蓋纏者，所有染污色聲香味觸想，所有不善想，所有非理所引想，所有障碍定想，總名種種想。彼想爾時不復引發，不復憶念，不復思惟，不復已思惟，不復當思惟，故名不思惟種種想。入無邊空，空無邊處具足住者：云何空無邊定加行？脩何加行，入空無邊處定？謂於此定，初修業者，先應思惟，第四靜慮爲麤苦障，次應思惟空無邊處，爲靜妙離；彼於爾時，若心散亂，馳流餘境，不能一趣，不能守念，令住一緣，脩空無邊定，齊此未名空無邊處定加行，亦未名入空無邊處定。彼若爾時攝錄自心，令不散亂，馳流餘境，能令一趣，住念一緣，思惟修習空無邊處定相；如是思惟，發勤精進，勇健勢猛，熾盛難制，勵意不息，是名空無邊處定加行，亦名入空無邊處定。彼於此道，生已脩習多脩習故，便令心住等住，近住安住，一趣等持，無二無退，齊此名爲已入空無邊處定。又此定

中，諸心意識，名空無邊處定俱有心。諸思等思，乃至造心意業，名空無邊處定俱有意業。諸心勝解，已勝解，當勝解，名空無邊處定俱有勝解。又此定中，若受，若想，乃至若慧等，名空無邊處定俱有諸法。如是諸法，亦名空無邊處定。

超一切種空無邊處者，謂彼爾時，於空無邊處想，超越等超越，故名超一切種空無邊處。入無邊識，識無邊處具足住者，云何識無邊處定加行。脩何加行，入識無邊處定。謂於此定，初脩業者，先應思惟空無邊處，爲麤苦障；次應思惟識無邊處，爲靜妙離；餘廣說，如空無邊處。

超一切種識無邊處者，謂彼爾時，於識無邊處想，超越等超越，故名超一切種識無邊處。入無所有，無所有處具足住者，云何無所有處定加行。脩何加行，入無所有處定。謂於此定，初脩業者，先應思惟識無邊處，爲麤苦障；次應思惟無所有處，爲靜妙離；餘廣說，如空無邊處。

超一切種無所有處者，謂彼爾時，於無所有處想，超越等超越，故名超一切種無所有處。入非想非非想處具足住者，云何非想非非想處定加行。脩何加行，入非想非

非想處定。謂於此定，初修業者，先應思惟無所有處，爲麤苦障；次應思惟非想非非想處，爲靜妙離；餘廣說，如空無邊處。

#### 脩定品第十四

一時，薄伽梵，在室羅筏，住逝多林，給孤獨園。爾時世尊，告苾芻衆：有四脩定，何等爲四。謂有修定，若習若修，若多所作，能令證得現法樂住。復有脩定，若習若修，若多所作，能令證得殊勝智見。復有修定，若習若修，若多所作，能令證得勝分別慧。復有修定，若習若修，若多所作，能令證得諸漏永盡。云何脩定，若習若修，若多所作，能令證得現法樂住。謂有苾芻，卽於自身，離生喜樂，滋潤，遍滋潤，充滿，遍充滿，適悅，遍適悅。故離生喜樂，於自身中，無有少分不充滿；是名脩定。若習若修，若多所作，能令證得現法樂住。云何脩定，若習若修，若多所作，能令證得殊勝智見。謂有苾芻，於光明想，善攝受，善思惟，善脩習，善通達，若晝，若夜，無有差別，若前，若後，無有差別，若上，若下，若上，無有差別，開心離蓋，修照俱心，除闇昧心，脩無量定，是名脩定。若習若修，若多所作，能令證得殊勝智見。云何脩定，若習若修，若多所作，能令證得勝分別慧。謂有苾芻，

善知受生，善知受住，善知受滅盡沒，於此住念非不住念；及善知想，善知尋，於此住念非不住念；是名脩定。若習若脩，若多所作，能令證得勝分別慧。云何脩定？若習若脩，若多所作，能令證得諸漏永盡。謂有苾芻，於五取蘊，數數隨觀，生滅而住，謂此是色，此是色集，此是色滅；此是受想行識，此是受想行識集，此是受想行識滅；是名脩定。若習若脩，若多所作，能令證得諸漏永盡。爾時世尊，爲攝前義，而說頌言：

斷欲想憂惱，

離憎沈惡作，

得清淨捨念，

法尋伺前行。

現法樂爲初，

次勝知見慧，

破無明等漏，

後證解脫果。

卽於自身者，謂身亦名身根，亦名身，五色根亦名身，四大種所造聚，亦名身，今此義中，意說四大種所造聚名身。離生喜樂者，謂初靜慮，所有喜樂平等受，受所攝身，輕安心，輕安，是名喜樂。如是喜樂，從離欲惡不善法，起等起，生等生，聚集出現，故名離生喜樂。滋潤遍滋潤，充滿遍充滿，適悅遍適悅者，謂卽於自四大種所造聚身，離生喜樂，起等起，生等生，聚集出現，滋潤遍滋潤，是一義；充滿遍充滿，是一義；適悅遍適悅，是一義；由下中上，長養差別。譬如農夫，初以少水，溉灌畦壟，爾時畦壟，滋潤遍滋潤；次以中水，溉灌畦壟，爾時畦壟，充滿遍充滿；後以多水，溉灌畦壟，爾時畦壟，適悅遍適悅。苾芻亦爾！初以下品離生喜樂，長養大種所造聚身，爾時自身，滋潤遍滋潤；次以中品離生喜樂，長養大種所造聚身，爾時自身，充滿遍充滿；後以上品離生喜樂，長養大種所造聚身，爾時自身，適悅遍適悅。離生喜樂，於自身中，無有少分而不充滿者，謂從足至頂，離生喜樂，作長養事，無不充滿。是名脩定者，云何爲定？謂卽於自身，離生喜樂，滋潤遍滋潤，充滿遍充滿，適悅遍適悅，故心住等住，近住安住，不散不亂，攝止等持，心一境性，總名爲定。云何爲脩？謂於此定，若脩若習，恆作常作，加行不捨，總名爲修。若習若脩，若多所作者，顯於此定，能得自在，能令證得現法樂住者，謂於此定，若習若脩，若多所作，於現法中，證得樂住，可愛可樂，可欣可意，無所悵望，無所思慕，寂靜安隱，故名樂住；於此樂住，得獲成就，親近觸證，故名證得。復次，初靜慮所攝離生喜樂，俱行心一境性，說名爲定；卽於此定，若脩若習，恆作常作，加行不捨，說名爲脩；若習若脩，若多所作，顯彼自在，能令證得現在樂住，義如前說。

於光明想善攝受等者，云何光明定加行？脩何加行，入光明定？謂於此定，初脩業者，

先應善取淨月輪相，或復善取淨日輪相，或復善取藥物末尼諸天宮殿星宿光明，或復善取燈燭光明，或復善取焚燒城邑川土光明，或復善取焚燒山澤曠野光明，或復善取焚燒十擔，或二十擔，或三十擔，或四十擔，或五十擔，或百擔，或千擔，或百千擔，或無量百擔，或無量千擔，或無量百千擔，薪火光明；此火光明，熾盛，極熾盛，洞然，遍洞然，隨取一種光明相已，審諦思惟，解了觀察，勝解堅住，而分別之。彼於爾時，若心散亂，馳流餘境，不能一趣，不能守念，令住一緣，思惟所取諸光明相，齊此未名光明定加行，亦未名入光明定。彼若爾時，攝錄自心，令不散亂，馳流餘境，能令一趣，住念一緣，思惟如是諸光明相；如是思惟，發勤精進，乃至勵意不息，是名光明定加行，亦名入光明定。彼於此道，生已脩習多脩習故，便令心住等住，近住安住，一趣等持，無二無退，思惟如是諸光明相，齊此名爲已入光明定，而未名爲光明定。云何名爲光明定？謂即依止前光明定，思惟如前諸光明相，諸想等想，解了取像，已想當想，名光明定；此光明定，名光明想。於光明想，善攝受者，謂於此想，恭敬攝受，慇懃攝受，尊重攝受，思惟彼因，彼門，彼理，彼方便，彼行相，故名善攝受。善思惟者，謂

數數起光明想已，數數思惟光明相。善脩習者，謂於此想，數習數脩，數多所作，故名善脩習。善通達者，謂於此想，等了審了，等審觀察，故名善通達。若晝，若夜，無有差別者，謂如晝分，審諦思惟，解了觀察，勝解堅住分別，如前諸光明相，夜分亦爾！如於夜分，審諦思惟，解了觀察，勝解堅住分別，如前諸光明相，晝分亦爾！故名若晝，若夜，無有差別。若前，若後，無有差別者，謂如對面，審諦思惟，解了觀察，勝解堅住分別，如前諸光明相，背面亦爾！如於背面，對面亦爾！復次，如於前時，審諦思惟，解了觀察，勝解堅住分別，如前諸光明相，今時亦爾！如於今時，前時亦爾！故名若前，若後，無有差別。若下，若上，無有差別者，謂如於下方，審諦思惟，解了觀察，勝解堅住分別，如前諸光明相，於上方亦爾！如於上方，於下方亦爾！故名若下，若上，無有差別。開心者，謂發起光明，照了鮮淨俱行之心。離蓋者，謂遠離昏沈睡眠纏蓋，心用明了。脩照俱心者，謂修習光明，照了鮮淨俱行之心。除闇昧心者，謂此心中，不起闇昧相，唯起光明相，如燈燭光，照了除闇。脩無量定者，謂修無量光明相定。是名修定者。云何爲定？謂即於光明，審諦思惟，解了觀察，勝解堅住分別，所起心住等住，乃至心一境性，總名爲

定。云何爲脩？謂於此定，若修若習，恒作常作，加行不捨，總名爲修。若習若修，若多所作者，顯於此定，能得自在，能令證得殊勝智見者，云何名爲殊勝智見？謂於此定，若習若脩，若多所作，至圓滿位，於舊眼邊，發起色界大種所造清淨天眼；依此天眼，生淨眼識；依此眼識，能遍觀察前後左右上下諸色，如如色界大種所造清淨天眼。舊眼邊起，如是如是，生淨眼識；依此眼識，領受觀察彼諸色，是名此中殊勝智見。有作是說：由意淨故，勝解觀見，卽人肉眼，變成天眼，名勝智見。今此義中，卽前所說，清淨眼識相應勝慧，說名爲智，亦名爲見，謂天眼識相應勝慧，領受觀察彼諸色，是名此中殊勝智見。彼於此定，若習若脩，若多所作，能令證得殊勝智見，得獲成就，親近觸證，殊勝智見，故名證得。復次：光明想，俱行心一境性，說名爲定；卽於此定，若脩若習，恒作常作，加行不捨，說名爲修；若習若修，若多所作，顯彼自在，能令證得殊勝智見，義如前說。

善知受生，善知受住，善知受滅盡沒者：謂審觀受生，審觀受住，審觀受滅盡沒。於此住念非不住念者：謂審觀受生時，具念正知；審觀受住時，具念正知；審觀受滅盡沒

時，具念正知。及善知想善知尋者：謂審觀想尋生，審觀想尋住，審觀想尋滅盡沒。於此住念非不住念者：謂審觀想尋生時，具念正知；審觀想尋住時，具念正知；審觀想尋滅盡沒時，具念正知。是名脩定者：云何爲定？謂彼爾時，作如是念：我於諸法，應正思惟，不起不善法，起諸善法；不起無記法，起有記法；令不善法不久住，令諸善法得久住；令無記法不久住，令有記法得久住；彼於爾時，亦觀察心，亦觀察心所法，彼觀察心，心所法時，所起心住等住，乃至心一境性，總名爲定。云何爲脩？謂於此定，若脩若習，恒作常作，加行不捨，總名爲脩。若習若修，若多所作者：顯於此定，能得自在，能令證得勝分別慧者：謂於此定，若習若修，若多所作，能令一切不善慧，非理所引慧，所有不善障定慧，皆悉破壞，捨置不起，此相違慧，生長堅住，由此故說能令證得勝分別慧。卽於此慧，得獲成就，親近觸證，故名證得。復次：審觀受想尋俱行心一境性，說名爲定；卽於此定，若脩若習，恒作常作，加行不捨，說名爲脩；若習若修，若多所作，顯彼自在，能令證得勝分別慧，義如前說。

於五取蘊，數數隨觀，生滅而住等者：謂如實知色生及變壞，如實知受想行識生及

變壞。是名脩定者。云何爲定？謂於五取蘊，數數隨觀生滅，而住所起心住等住，乃至心一境性，總名爲定。云何爲修？謂於此定，若修若習，恒作常作，加行不捨，總名爲修。若習若修，若多所作者，顯於此定，能得自在，能令證得諸漏永盡者，漏謂三漏，卽欲漏、有漏、無明漏，彼於此定，若習若修，若多所作，能令三漏盡等盡，遍盡、究竟盡，故名諸漏永盡。於此永盡，得獲成就親近觸證，故名證得。復次，第四靜慮所攝清淨捨念俱行，趣阿羅漢無間道，所攝心一境性，說名爲定；卽於此定，若修若習，恒作常作，加行不捨，說名爲修。若習若修，若多所作，顯彼自在，能令證得諸漏永盡，義如前說。

覺支品第十五之一

一時，薄伽梵，在室羅筏，住逝多林，給孤獨園。時有苾芻，來詣佛所，到已頂禮世尊，雙足，却住一面，而白佛言：世尊！嘗說覺支，覺支此言何義？世尊告曰：此覺支，言顯七覺支，何等爲七？謂念覺支，擇法覺支，精進覺支，喜覺支，輕安覺支，定覺支，捨覺支。如是覺支，漸次而起，漸次而得，修令圓滿。時彼苾芻，復白佛言：云何覺支漸次而起，漸次而得，修令圓滿？佛告苾芻：若有於身住循身觀，安住正念，遠離愚癡，爾時便起念覺

支，得念覺支，修令圓滿。彼由此念，於法簡擇，極簡擇，遍尋思，遍伺察，審諦伺察，爾時便起擇法覺支，得擇法覺支，脩令圓滿。彼由擇法，發勤精進，心不下劣，爾時便起精進覺支，得精進覺支，修令圓滿。彼由精進，發生勝喜，遠離愛味，爾時便起喜覺支，得喜覺支，脩令圓滿。彼由此喜，身心輕安，遠離羸重，爾時便起輕安覺支，得輕安覺支，脩令圓滿。彼由輕安，便受快樂，樂故心定，爾時便起定覺支，得定覺支，脩令圓滿。彼由心定，能滅貪憂，住增上捨，爾時便起捨覺支，得捨覺支，脩令圓滿。於受心法，住循受心法觀，廣說亦爾！如是覺支，漸次而起，漸次而得，脩令圓滿。

云何念覺支？謂世尊說：若聖弟子，於此內身住循身觀，若具正勤、正知、正念，除世貪憂；於彼外身住循身觀，若具正勤、正知、正念，除世貪憂；於內外身住循身觀，若具正勤、正知、正念，除世貪憂；於內外俱受心法三，廣說亦爾。脩習如是四念住時，所有無漏作意相應，諸念隨念，專念憶念，不忘不失，不遺不漏，不失法性，心明記性，總名爲念，亦名念根，亦名念力，亦名念覺支，亦名正念；是聖出世無漏無取道，隨行道，俱有道隨轉，能正盡苦，作苦邊際；諸有學者，如所見諸行思惟觀察，令至究竟，於諸行中，

深見過患，於永涅槃，深見功德；若阿羅漢，如解脫心，思惟觀察，令至究竟，所有無漏作意相應，諸念隨念，乃至心明記性，是名念覺支。

云何擇法覺支？謂世尊說：若聖弟子，能如實知善、不善法，有罪、無罪法，應修、不應修法，下劣勝妙法，黑白法，有敵對法，緣生法。能如實知善、不善法者：云何善法？謂善身語業，善心、心所法，善心不相應行，及擇滅，是名善法。云何不善法？謂不善身語業，不善心、心所法，不善心不相應行，是名不善法。彼於如是善、不善法，以如實正慧，簡擇、極簡擇、遍尋思、遍伺察、審諦伺察，是名能如實知善、不善法。能如實知有罪、無罪法者：云何有罪法？謂三惡行，三不善根，十不善業道，是名有罪法。云何無罪法？謂三妙行，三善根，十善業道，是名無罪法。彼於如有罪、無罪法，以如實正慧，簡擇、極簡擇、遍尋思、遍伺察、審諦伺察，是名能如實知有罪、無罪法。能如實知應修、不應修法者：云何應修法？謂三妙行，三善根，十善業道，親近善士，聽聞正法，如理作意，法隨法行，恭敬聽聞，密護根門，飲食知量，初夜後夜，會不睡眠，勤脩諸善，是名應修法。復次：四念住，四正勝，四神足，五根五力，七等覺支，八支聖道，四正行，四法迹，奢摩他毗鉢舍

那，亦名應修法。云何不應修法？謂三惡行，三不善根，十不善業道，親近不善士，聽聞不正法，不如理作意，行非法行，不恭敬聽，不恭敬問，不密護根門，飲食不知量，初夜後夜，常習睡眠，不勤脩善，是名不應修法。彼於如是應修、不應修法，以如實正慧，簡擇、極簡擇、遍尋思、遍伺察、審諦伺察，是名能如實知下劣、勝妙法。能如實知下劣、勝妙法者：云何下劣法？謂不善法，及有覆無記，是名下劣法。云何勝妙法？謂諸善法，及無覆無記，是名勝妙法。彼於如是下劣、勝妙法，以如實正慧，簡擇、極簡擇、遍尋思、遍伺察、審諦伺察，是名能如實知下劣、勝妙法者：云何黑白法？謂不善法，名黑，善法，名白；有罪法，名黑，無罪法，名白；不應修法，名黑，應修法，名白；下劣法，名黑，勝妙法，名白；是名黑白法。彼於如是黑白法，以如實正慧，簡擇、極簡擇、遍尋思、遍伺察、審諦伺察，是名能如實知黑白法者：云何黑白法？謂不善法，名黑，善法，名白；有罪法，名黑，無罪法，名白；不應修法，名黑，應修法，名白；下劣法，名黑，勝妙法，名白；是名黑白法。彼於如是黑白法，以如實正慧，簡擇、極簡擇、遍尋思、遍伺察、審諦伺察，是名能如實知黑白法者：云何有敵對法？謂貪、無貪，互相敵對，瞋、無瞋，互相敵對，痴、無痴，互相敵對，是名有敵對法。彼於如有敵對法，以如實正慧，簡擇、極簡擇、遍尋思、遍伺察、審諦伺察，是名能如實知有敵對法。能如實知緣生法者：云何緣生法？謂緣起法，及緣已生法，總名緣生法。彼於如

是緣生法，以如實正慧，簡擇、極簡擇、遍尋思、遍伺察，審諦伺察，是名能如實知緣生法。彼如實知善、不善法，廣說乃至緣生法時，所有無漏作意相應，於法簡擇、極簡擇、最極簡擇、解了、等了、近了，機點通達，審察聰叡，覺明慧行，毗鉢舍那，總名爲慧，亦名慧根，亦名慧力，亦名擇法覺支，亦名正見；是聖出世無漏無取道，隨行道，俱有道隨轉，能正盡苦，作苦邊際；諸有學者，如所見諸行，思惟觀察，令至究竟；於諸行中，深見過患，於永涅槃，深見功德；若阿羅漢，如解脫心，思惟觀察，令至究竟；所有無漏作意相應，於法簡擇，乃至毗鉢舍那，是名擇法覺支。

云何精進覺支？謂世尊說：若聖弟子，爲令已生惡、不善法斷故，起欲、發勤精進，策心持心，爲令未生惡、不善法不生故，起欲、發勤精進，策心持心；爲令未生善法生故，起欲、發勤精進，策心持心；爲令已生善法，堅住不忘，脩滿倍增，廣大智作證故，起欲、發勤精進，策心持心。彼修如是四正勝時，所有無漏作意相應，諸勤精進，勇健勢猛，熾盛難制，勵意不息，總名精進，亦名精進根，亦名精進力，亦名精進覺支，亦名正勤；是聖出世無漏無取道，隨行道，俱有道隨轉，能正盡苦，作苦邊際；諸有學者，如所見諸

行，思惟觀察，令至究竟；於諸行中，深見過患；於永涅槃，深見功德；若阿羅漢，如解脫心，思惟觀察，令至究竟；所有無漏作意相應，諸勤精進，乃至勵意不息，是名精進覺支。

云何喜覺支？謂世尊說：大名當知！若聖弟子，以如是相隨念諸佛，謂此世尊，是如來阿羅漢，正等覺，明行圓滿，善逝，世間解，無上丈夫，調御士，天人師，佛，薄伽梵。彼聖弟子，以如是相隨念佛時，貪不纏心，瞋不纏心，痴不纏心；於如來所，其心正直，心正直故，得義威勢，得法威勢；於如來所，能引起欣，欣故，生喜心，喜故，身安，身安故，受樂，樂故，心定，心定故，於不平等諸有情類，得住平等；於有惱害諸有情類，住無惱害；得預法流，於諸佛所脩隨念故，乃至能證究竟涅槃。復次：大名！若聖弟子，以如是相隨念正法，謂佛正法，善說現見，無熱應時，引導進觀，智者內證。彼聖弟子，以如是相隨念法時，貪不纏心，瞋不纏心，痴不纏心；於正法所，其心正直，心正直故，得義威勢，得法威勢；於正法所，能引起欣，欣故，生喜心，喜故，身安，身安故，受樂，樂故，心定，心定故，於不平等諸有情類，得住平等；於有惱害諸有情類，住無惱害；得預法流，於正法所脩



隨念故，乃至能證究竟涅槃。復次：大名！若聖弟子，以如是相隨念僧伽，謂佛弟子，具足妙行，質直行，如理行，法隨法行，和敬行，隨法行。又佛弟子，有預流向，有預流果；有一來向，有一來果；有不還向，有不還果；有阿羅漢向，有阿羅漢果；如是總有四雙八隻補特伽羅。如是僧伽，戒具足，定具足，慧具足，解脫具足，解脫智見具足，應請應屈，應恭敬無上福田，世所應供。彼聖弟子，以如是相隨念僧時，貪不纏心，瞋不纏心，痴不纏心；於僧伽所，其心正直，心正直故，得義威勢，得法威勢；於僧伽所，能引起欣，欣故，生喜，心喜故，身安，身安故，受樂，樂故，心定，心定故，於不平等諸有情類，得住平等；於有惱害諸有情類，住無惱害；得預法流，於僧伽所脩隨念故，乃至能證究竟涅槃。復次：大名！若聖弟子，以如是相隨念自戒，謂我淨戒，不缺不穿，不雜不穢，堪受供養，無隱昧，善究竟，善受持，智者稱讚，常無譏毀。彼聖弟子，以如是相隨念自戒時，貪不纏心，瞋不纏心，痴不纏心；於自戒所，其心正直，心正直故，得義威勢，得法威勢；於自戒所，能引起欣，欣故，生喜，心喜故，身安，身安故，受樂，樂故，心定，心定故，於不平等諸有情類，得住平等；於有惱害諸有情類，住無惱害；得預法流，於自戒所脩隨念故，乃

至能證究竟涅槃。復次：大名！若聖弟子，以如是相隨念自施，謂我今者，善得勝利，雖居無量慳垢所纏，衆生聚中，而心遠離一切慳垢，能行惠施，雖處居家，而能不著一切財寶，舒手布施，作大祠祀，供養福田，惠捨具足，樂等分布。彼聖弟子，以如是相隨念自施時，貪不纏心，瞋不纏心，痴不纏心；於自施所，其心正直，心正直故，得義威勢，得法威勢；於自施所，能引起欣，欣故，生喜，心喜故，身安，身安故，受樂，樂故，心定，心定故，於不平等諸有情類，得住平等；於有惱害諸有情類，住無惱害；得法預流，於自施所脩隨念故，乃至能證究竟涅槃。復次：大名！若聖弟子，以如是相隨念諸天，謂有四天王衆天，三十三天，夜摩天，覩史多天，樂變化天，他化自在天，如是諸天，成就信故，戒故，聞故，捨故，慧故，從此處沒，生彼天中，受諸快樂，我亦有信，戒，聞，捨，慧，亦當生彼，與諸天衆，同受快樂。彼聖弟子，以如是相隨念天時，貪不纏心，瞋不纏心，痴不纏心；於諸天所，其心正直，心正直故，得義威勢，得法威勢；於諸天所，能引起欣，欣故，生喜，心喜故，身安，身安故，受樂，樂故，心定，心定故，於不平等諸有情類，得住平等；於有惱害諸有情類，住無惱害；得法預流，於諸天所脩隨念故，乃至能證究竟涅槃。彼修如

是六隨念時，所有無漏作意相應，心欣極欣，現前極欣，欣性欣類，適意悅意，喜性喜類，樂和合、不別離，歡欣悅豫，有堪任性，踊躍、踊躍性，歡喜、歡喜性，總名爲喜，亦名喜覺支；是聖出世無漏無取道，隨行道，俱有道隨轉，能正盡苦，住苦邊際；諸有學者，如所見諸行，思維觀察，令至究竟；於諸行中，深見過患，於永涅槃，深見功德；若阿羅漢，如解脫心，思維觀察，令至究竟；所有無漏作意相應，心欣極欣，乃至歡喜、歡喜性，是名喜覺支。

說一切有部法蘊足論卷第八